

## **Eth conilh color broma**

Tot comencèc quan es pairs de Laia li demanèren qu'endrecèsse era sua abitacion, pr'amor que l'auie tan desendreçada que non se podie ne passar.

- Se non l'endreces un shinhau -didec sa pair- auram d'acabar hènt un pònt entà poder arribar enquiath balcon.

E eth cas ei que, mentre l'endreçaue, Laia trapèc ath hons deth hons dera cistalha des joguets, eth sòn estimat conilh de peluig que hège tant de temps que non vedie quina alegror!

- Òla, Bromalh! -li didec Laia en tot abraçar-lo.

E ei que hège fòrça mesi que non i jogauè, pr'amor qu'auie quedat acogat jos es auti joguets... Ère un conilh d'un color gris de broma a punt de plòir. Auie ues aures longues e nervioses, damb ua taqueta blanca en cadua des puntas e com ja sabetz, se didie Bromalh.

Un shinhau avergonhida pr'amor d'auer-lo agut tant de temps desbrenbat, aquera net se l'emportèc a dormir damb era. E mentre li explicaue causes e causes e causes, se quedèc ben endormida. E sonièc que passejaue peth miei d'un bòsc fòrça gran e fòrça espès damb eth sòn amic.

E londeman maitin, quan sa mair, damb un uelh miei dubèrt e er aute miei barrat de tan endormiscada com ère, l'anèc a desvelhar pr'amor que se lheuèsse, Laia se dèc compde suspresa! que Bromalh non i ère.

Lo cerquèc de pertot: jos deth coishin, jos deth matalàs, jos deth lhet, jos deth tapís, laguens der armari, laguens deth bassin. Ai non! que non n'i auie! Lo cerquèc per laguens e per dehòra de toti es cornèrs, mès non lo trapèc enlòc.

Auie desapareishut! Laia se metec a plorar. Qu'auie passat?. Per qué non i ère? Com podie èster que se n'auesse anat?

Es sòns pairs, que tanpòc non comprenien ce qué auie passat, sagèren d'assolatjar-la en tot hèr-li tota sòrta de palhassades: que se s'auie amagat laguens d'un chapèu magic que se'n auie anat a crompar ua carròta, que se s'auie honut.

Mès ada era non li heren bric de gràcia, aguestes badinades, e non se li escapèc ne un arridolet. Ath delà, se hège tard e auie d'anar tà estudi. Ère tan desengustada que perdec era hame, e coma que, quan non i a hame, un bòl de lèit semble un farrat, non se la podec acabar. Laia ère tan trista qu'era sua familia comencèc a engüejar-se de vertat.

-Quin mistèri! -didec sa pair.

-Quina causa mès estranha! -didec sa mair.

-Semble un jòc de mans! -didec sa pair-sénher.

-Semble causa de bruishes! -didec sa mair-sénher.

Toti se planhien mès arrés non sabie ce com suenhar eth patiment de Laia.

Passats cinc dies totun, quan Laia se'n anèc anar dromir trista e desconsolada, non se podie ne imaginar qu'aquera net viuerie ua causa fòrça especiau. Sonièc qu'ère ath miei d'un bòsc fòrça gran e fòrça huelhós. Hège un dia polit.

Eth solei e es ombres reposauen silenciosament sus eth verdum dera tèrra s'entenie cantar es audèths e tot hège aulor de gèsta. De tant en tant, viege un ventet doç que jogau a despientar-li eth peu.

-Qu'estranh! - pensèc- me semble que ja i è estat un aute viatge, en aguest bòsc.

-Mès, de patac, es audèths carèren e se hec un gran silenci.

Es colors s'amortèren, eth bòsc s'enfosquic e eth vent hugec veloç peth miei des arbes. Tanben semblaue que s'auesse des·hèt aqueth perhum der aire.

Laia, inquieta, s'arturèc qué passaue?

-Pam! Pam! Pom!

Es tirs retroniren violentament enes sues aures e s'espantèc.

Alavetz comencèc a sènter es lairets des gossets e es crits des çaïres:

-Entà delà, corretz!

Toti corrien entà delà! a on ère era! Amagada ath darrèr d'un segalh quieta com ua estatua e mòrta de pòur siguec alavetz quan lo vedec. Bromalh corrie desesperat, en tot húger des sòns perseguidors rapida coma un relampit, en tot profiter un moment qu'eth conilh artenhèc despistar es gossets, lo aganchèc e s'enhilèc en primèr arbe que podec estrenhent-lo en sòn pièch e lèu sense respirar vedec passar de long gossets e çaïres entremiei d'un sorrolh esglasiant.

- Of! -didec Laia damb un hui de votz- non mos an vist èm sauvadi!

A pòga pòc es audèths se metèren a cantar, es colors s'aluguèren e eth bòsc, un aute viatge plen d'ombres e de solei tornèc a hèr flaira de gèsta.

Alavetz Bromalh li expliquèc que hège cinc dies que viuie perdut en aqueth bòsc e quilhant es aures e damb era veu trincada, higeç:

- Totun, ère segur que tornaries a cercar-me en un aute des tòns sonis.

- Qu'ei clar ! Ara j'ac compreni tot !

E ei que, en aqueth moment, Laia rebrembèc que hège quate nets, justament era net que s'auie dromit parlant damb Bromalh, auie soniat que passejauen toti dus amassa per aguest bòsc. Tanben rebrembèc que Bromalh, com qu'ère trist e enfadat peth tord d'auer-lo agut tant de temps abandonat ath hons dera cistalha des juguets, s'auie escapat entath bòsc.

- Praube Bromalh! -didec Laia.

- Tant que t'è cercat! quina mala sòrt! è tardat cinc dies en tornar a soniar aguest madeish bòsc. Non sabia que t'i auies quedat que t'auies perdut laguens deth mèn sòn que ben que t'è trapat! Tornam tà casa?

E dit açò, se honeren en ua abraçada tan fòrta e tan longa que de pòc queigueren der arbe.

Aqueth maitin, era que queigues, e de cuu en tèrra, sigues era mair de Laia quan l'anèc a desvelhar com tostemp, damb un uelh miei dubèrt e er aute miei barrat e vedec que Laia dromie ben abraçada a Bromalh.

E encara peyor sigues çò que li arribèc a sa pair, donc quedèc tan estonat e desconcertat que se dochèc damb eth burnòs metut.

E ara ora der esdejoar, en tant que Laia beuie un farrat voi díder un bòl de lèit plen a rebohar, tota era familia comentauè era estranha aparicion deth conilhet totun, arrés non i trapauè cap d'explic:

- Quin mistèri! -didec sa pair mòg com un rajòu d'aigua.
- Quina causa mès estranha! -didec sa mair.
- Semble un jòc de mans! -didec sa pair-sénher.
- Semble causa de bruishes! -didec sa mair-sénher.

Toti se planhien estonats, mens Laia, que caraue, arridolauè e, de tant en tant, s'en guardaue Bromalh e li clucaue eth uelhet.

*Guidon: Manel Riera-Eures*

- 
- 
- Amb el suport de 

© CCRTV Interactiva, S.A. | Televisió de Catalunya, S.A.

- [Avís legal](#) |
- [Segell de qualitat](#) |
- [Contacta 5480](#) |
- - [Idiomes](#)
    - [Català](#)
    - [Castellano](#)
    - [English](#)